

## PARROTT, HORACE IAN (1916-2012), athro a chyfansoddwr

**Enw:** Horace Ian Parrott

**Dyddiad geni:** 1916

**Dyddiad marw:** 2012

**Priod:** Jeanne May Parrott (née Peckham)

**Priod:** Elizabeth Olga Parrott (née Cox)

**Rhiant:** Muriel Annie Parrott (née Blackford)

**Rhiant:** Horace Bailey Parrott

**Rhyw:** Gwryw

**Galwedigaeth:** athro a chyfansoddwr

**Maes gweithgaredd:** Addysg; Cerddoriaeth

**Awdur:** Rhidian Griffiths

Ganed Ian Parrott ar 5 Mawrth 1916 yn Streatham, Llundain. Roedd ei dad, Horace Bailey Parrott (1883-1953), yn beiriannydd a weithiai i'r British Oxygen Company, ac roedd ei fam Muriel Annie (ganwyd Blackford, 1883-1958) yn bianydd dawnus. Cafodd Ian hyfforddiant cynnar ar y piano gan ei fam, a gwersi preifat gan y cyfansoddwr Benjamin Dale. Addysgwyd ef yn ysgol Harrow (1929-31), y Coleg Cerdd Brenhinol (1932-4) a'r Coleg Newydd, Rhydychen (1934-7). Bu'n athro yn Malvern o 1937 hyd 1939 a graddiodd yn D. Mus. (Rhydychen) yn 1940. Gwasanaethodd yn y fyddin yn y Corfflu Signalau yn ystod yr Ail Ryfel Byd a threuliodd amser yn yr Aifft, a ysbrydolodd ei ddarnau i gerddorfa, *El Alamein* (1944), a *Luxor*, a enillodd iddo wobwr gyntaf y Gymdeithas Ffilharmonig Frenhinol yn 1949. Yn 1946 cawsai ei benodi'n ddarlithydd ym Mhrifysgol Birmingham, ac yna yn 1950 fe'i penodwyd i Gadair Gerdd Gregynog yng Ngholeg Prifysgol Cymru Aberystwyth, swydd a ddaliodd tan ei ymddeoliad yn 1983. Gwelodd dwf sylweddol ym maint yr Adran Gerdd, ac ymhlith ei ddisgyblion yno yr oedd y cyfansoddwyr [William Mathias](#) a David Harries.

Cymerodd Ian Parrott ddiddordeb byw yn nhraddodiadau cerddorol gwlad ei fabwysiad; dysgodd Gymraeg, a mynnai gael ei ystyried yn gyfansoddwr Cymreig. Roedd yn un o sylfaenwyr yr Urdd er Hyrwyddo Cerddoriaeth Cymru yn 1959. Ailsefydlodd yl Gregynog a bu'n arwain yno am ddeng mlynedd. Gwnaeth ddefnydd helaeth o alawon gwerin Cymreig yn ei opera *The Black Ram* (1957), sy'n seiliedig ar stori o Ffynnon Bedr, ger Llanbedr Pont Steffan, ac mae ei osodiad o'r gwasanaeth cymun, *A Welsh Folk Mass*, hefyd yn defnyddio cerddoriaeth draddodiadol. Cyfansoddodd yn helaeth i gerddorfa hefyd, gan gynnwys yr agorawd *Seithenyn* (1959), a gomisiynwyd gan y BBC, ac *Arfordir Ceredigion*, darn comisiwn arall, a berfformiwyd yn yr Eisteddfod Genedlaethol yn Aberystwyth yn 1992. Lluniodd bum simffoni a phum pedwarawd llinynnol, a llu o ddarnau lleisiol ac offerynnol. Dyfarnwyd iddo nifer o wobrau ac anrhydeddau, gan gynnwys Medal Gerddoleg Harriet Cohen yn 1966.

Ysgrifennodd weithiau i ieuencid ar werthfawrogi cerddoriaeth: *Pathways to Modern Music* (1947) ac *A Guide to Musical Thought* (1949); cyfrol ar weithgarwch cerddorol Gregynog yng nghyfnod [Gwendoline](#) a [Margaret Davies](#), *The Spiritual Pilgrims*, ac astudiaethau o'r cyfansoddwyr Edward Elgar, Peter Warlock a Cyril Scott. Cyhoeddodd hunangofiant, *Parrottcisms*, yn 2003.

Priododd yn 1940 ag Elizabeth (bu farw 1994), a chawsant ddau fab. Priododd eilwaith yn 1996 â Jeanne Peckham (bu farw 2010). Bu ef farw 4 Medi 2012 a chynhaliwyd ei angladd yn eglwys Llanbadarn Fawr 12 Medi. Claddwyd ei weddillion ym mynwent eglwys Llanbadarn.

### Awdur

Rhidian Griffiths

### Ffynonellau

*The Times*, 5 Hydref 2012

*The Daily Telegraph*, 9 Hydref 2012

*The Independent*, 3 Rhagfyr 2012

*Cerddoriaeth Cymru*, 5/2 (1976)

### Darllen Pellach

Erthygl Wicipedia: [Ian Parrott](#)

## Dolenni Ychwanegol

VIAF: [37082534](#)

Wikidata: [Q3138404](#)

Dyddiad cyhoeddi: 2014-06-04

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

